

09/12/2000

Lunas: MIC serah laporan minggu depan

KUALA LUMPUR, Jumaat - MIC akan menyerahkan hasil post mortem pilihan raya kecil Dewan Undangan Negeri (DUN) Lunas, Kedah kepada Perdana Menteri Datuk Seri Dr Mahathir Mohamad, minggu depan.

Presidennya, Datuk Seri S Samy Vellu berkata, MIC sedang menyiapkan laporan itu sebelum diserahkan kepada Perdana Menteri yang juga Presiden Barisan Nasional (BN).

"Kami akan hantar kepada Perdana Menteri. Dr Mahathir akan menganalisisnya dan mengambil tindakan sewajarnya," katanya kepada pemberita selepas menghadiri majlis penyampaian sijil MS ISO 9001 kepada Jabatan Kerja Raya di sini, hari ini.

Pada pilihan raya kecil Lunas 29 Nov lalu, calon BN dari MIC, S Anthonysamy dikalahkan calon Parti Keadilan Nasional, Saifuddin Nasution Ismail dengan majoriti tipis 530 undi. Anthonysamy memperoleh 9,981 undi, Saifuddin mendapat 10,511 undi manakala calon bebas N Letchumanan mendapat 50 undi.

Samy Vellu juga tidak mahu mengulas dakwaan beliau sebelum ini yang polis lewat bertindak terhadap penyokong pembangkang pada pilihan raya kecil itu.

"Saya tidak akan membincangkan perkara ini menerusi media. Saya sudah menyatakan pendapat saya dan tidak berhasrat menambah apa-apa," katanya yang mengesahkan belum menemui Ketua Polis Negara Tan Sri Norian Mai mengenai dakwaan itu kerana masing-masing terlalu sibuk dengan tugas.

"Dia (Norian) pun sibuk sekarang tetapi saya dah beri semua maklumat. Satu hari nanti, bila dia senang, kita akan jumpa untuk bincang macam mana kita boleh bantu antara satu sama lain di masa akan datang," katanya.

(END)